



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

22.06.2020թ.

Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ՍՑ-ԼՕ-2020/132

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Լ. Անանիկյանի

Պատվիրատու՝ Երևանի քաղաքապետարան
Մասնակից՝ «Ռաշն Վոյաժ» ՍՊԸ

Գնման ընթացակարգի ծածկագիրը և առարկան՝

1. «ԵԲ-ԲՄԱՇՁԲ-20/53» ծածկագրով բաց մրցույթ, Կենտրոնի վարչական շրջանի
թիվ 20, 21, Նոր Նորք վարչական շրջանի թիվ 99 և Մալաթիա-Սեբաստիա վարչական
շրջանի թիվ 76 մանկապարտեզների հիմնանորոգման աշխատանքների ձեռքբերում,

2. «ԵԲ-ԲՄԱՇՁԲ-20/64» ծածկագրով բաց մրցույթ, Երևան քաղաքի վարչական
շրջանների բազմաբնակարան շենքերի մուտքերի վերանորոգման աշխատանքների
ձեռքբերում:

ՀՀ գնումների հետ կապված բողոքներ քննող անձը (այսուհետ՝ նաև Բողոքներ
քննող անձ)՝ ուսումնասիրելով Հայաստանի Հանրապետության ֆինանսների
նախարարության կողմից 23.05.2020թ.-ի թիվ 26/26-1/7675-2020 գրությամբ «Ռաշն
Վոյաժ» ՍՊԸ-ին (այսուհետ նաև՝ Մասնակից) գնումների գործընթացին մասնակցելու
իրավունք չունեցող մասնակիցների ցուցակում ներառելու նպատակով նախաձեռնված
ընթացակարգով ներկայացված հիմքերը,

Պ Ա Ր Զ Ե Ց

1. Գործի նախապատմությունը

ՀՀ ֆինանսների նախարարությունը, Երևանի քաղաքապետարանի (այսուհետ նաև՝ Պատվիրատու) 20.05.2020թ.-ի թիվ 01/61-8197 գրության հիման վրա, 23.05.2020թ.-ին «Ռաշն Վոյաժ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձին գործը մակագրվել է 23.05.2020թ.-ին:

25.05.2020թ.-ին կայացված որոշմամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ, տրվել թիվ ՍՑ-ԼՕ-2020/132 համարի ծածկագիրը և հրապարակվել է www.gnumner.am կայքում:

04.06.2020թ.-ին և 22.06.2020թ.-ին նշանակվել և հրավիրվել են նիստեր:

Գործի քննությունն ավարտվել է 04.06.2020թ.-ին և Բողոքներ քննող անձի որոշման հրապարակման օր է նշանակվել 22.06.2020թ.-ին:

2. Երևանի քաղաքապետարանի ներկայացրած փաստերը և դիրքորոշումը.

Երևանի քաղաքապետարանը 20.05.2020թ.-ի թիվ 01/61-8197 գրությամբ դիմելով ՀՀ ֆինանսների նախարարությանը՝ հայտնել է հետևյալը.

«Տեղեկացնում եմ, որ գնումների մասին ՀՀ օրենսդրությամբ սահմանված կարգով Երևանի քաղաքապետարանի կողմից կազմակերպված «ԵՔ-ԲՄԱՇՁԲ-20/53» և «ԵՔ-ԲՄԱՇՁԲ-20/64» ծածկագրերով գնման ընթացակարգերին մասնակցության հայտ է ներկայացրել «Ռաշն Վոյաժ» ՍՊԸ-ն (այսուհետև՝ Մասնակից):

Երևանի քաղաքապետարանի կողմից կատարվել է բանկային երաշխիքների իսկության ճշգրտում, որի արդյունքում պարզվել է, որ ներկայացված բանկային Երաշխիքները չեն թողարկվել «Ամերիաբանկ» ՓԲԸ կողմից և հանդիսանում է կեղծ փաստաթղթեր:

Գնահատող հանձնաժողովը ղեկավարվելով ՀՀ կառավարության 04.05.2017 թվականի 526-Ն որոշմամբ հաստատված «Գնումների գործընթացի կազմակերպման»

կարգի 33-րդ կետի 8-րդ ենթակետի պահանջներով մերժել է Մասնակցի կողմից ներկայացված հայտը, որը հանգեցրել է գնման գործընթացին վերջինիս հետագա մասնակցության դադարեցմանը:

Վերոգրյալ իրավական հիմքերով պայմանավորված՝ ղեկավարվելով «Գնումների մասին» օրենքի /այսուհետ՝ Օրենք/ 6-րդ հոդվածի 1-ին մասի 2-րդ ենթակետով, առաջարկում եմ Մասնակցի նկատմամբ կիրառել Օրենքի 50-րդ հոդվածի 7-րդ մասի 2-րդ կետով սահմանված դրույթը:»:

Ելնելով վերոգրյալից և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, Պատվիրատուն կից ներկայացրել է «ԵԲ-ԲՄԱՇՁԲ-20/53» և «ԵԲ-ԲՄԱՇՁԲ-20/64» ծածկագրերով հայտարարված գնման ընթացակարգի շրջանակներում «Ռաշն Վոյս» ՍՊԸ-ի տվյալները՝ համապատասխան հիմքերով:

3. «Ռաշն Վոյս» ՍՊԸ-ի ներկայացրած փաստարկները և դիրքորոշումը.

Բողոքներ քննող անձը 25.05.2020թ.-ին գրությամբ դիմել է «Ռաշն Վոյս» ՍՊԸ-ին՝ հնարավորություն տալով ՀՀ ֆինանսների նախարարության կողմից 23.05.2020թ.-ի թիվ 26/26-1/7675-2020 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը ստանալով կարծիք հայտնելու վերաբերյալ գրությունը, ինչպես նաև ծանուցված լինելով նիստերի տեղի, օրվա և ժամի մասին, չի ներկայացրել գրավոր դիրքորոշում, առարկություններ կամ կարծիք՝ չներկայանալով նաև հրավիրված նիստին:

4. ՍՑ-ԼՕ-2020/132 ընթացակարգի քննության համար էական նշանակություն ունեցող փաստերը.

Սույն գործի քննության համար էական նշանակություն ունեցող փաստերի համաձայն՝

i. Երևանի քաղաքապետարանի (այսուհետ նաև՝ Պատվիրատու) կողմից Կենտրոնի վարչական շրջանի թիվ 20, 21, Նոր Նորք վարչական շրջանի թիվ 99 և Մալաթիա-Սեբաստիա վարչական շրջանի թիվ 76 մանկապարտեզների հիմնանորոգման աշխատանքների ձեռքբերման նպատակով 04.03.2020թ.-ին և Երևան քաղաքի վարչական

շրջանների բազմաբնակարան շենքերի մուտքերի վերանորոգման աշխատանքների ձեռքբերման նպատակով 25.02.2020թ.-ին հայտարարվել է համապատասխանաբար թիվ «ԵՔ-ԲՄԱՇՁԲ-20/53» և թիվ «ԵՔ-ԲՄԱՇՁԲ-20/64» ծածկագրերով բաց մրցույթներ (այսուհետ նաև՝ Մրցույթ):

ii. Մրցույթին մասնակցելու նպատակով հայտ է ներկայացրել նաև «Ռաշն Վոյաժ» ՍՊԸ-ն:

iii. «Ռաշն Վոյաժ» ՍՊԸ-ն մասնակցության հայտի թիվ 1 հավելվածով՝ բաց մրցույթին մասնակցելու դիմում-հայտարարությամբ, հայտարարել և հավաստել է, որ բավարարում է թիվ «ԵՔ-ԲՄԱՇՁԲ-20/53» և թիվ «ԵՔ-ԲՄԱՇՁԲ-20/64» ծածկագրերով բաց մրցույթների հրավերներով սահմանված մասնակցության իրավունքի պահանջներին և պարտավորվում ընտրված մասնակից ճանաչվելու դեպքում, հրավերով սահմանված կարգով և ժամկետում, ներկայացնել գնային առաջարկի չափով որակավորման ապահովում:

iv. թիվ «ԵՔ-ԲՄԱՇՁԲ-20/53» ծածկագրով բաց Մրցույթի գնահատող հանձնաժողովի (այսուհետ նաև՝ Հանձնաժողով) 11.05.2020թ.-ի նիստի թիվ 5 արձանագրության համաձայն՝ Երևանի քաղաքապետարանի կողմից կատարվել է «Ռաշն Վոյաժ» ՍՊԸ-ի կողմից ներկայացված բանկային երաշխիքի իսկության ճշտում, որի արդյունքում պարզվել է, որ ներկայացված բանկային երաշխիքը չի թողարկվել համապատասխան բանկի կողմից և հանդիսանում է կեղծ փաստաթուղթ:

v. Նույն արձանագրության համաձայն՝ հաշվի առնելով, որ «Ռաշն Վոյաժ» ՍՊԸ-ն մինչև պայմանագրի կնքումը ներկայացրել է կեղծ փաստաթղթեր և վերջինս ընտրված մասնակից ճանաչելու մասին որոշումը չի համապատասխանել Հայաստանի Հանրապետության օրենսդրությանը, ուստի հանձնաժողովը, հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման մասին» Կարգի 33-րդ կետի 8-րդ ենթակետը, որոշել է չեղյալ հայտարարել 2020թ.-ի ապրիլի 30-ի թիվ 3 արձանագրության 2.1 և 2.2 կետերով ընդունված որոշումները և «Ռաշն Վոյաժ» ՍՊԸ-ի կողմից ներկայացրած հայտը մերժել:

vi. թիվ «ԵՔ-ԲՄԱՇՁԲ-20/64» ծածկագրով բաց Մրցույթի գնահատող հանձնաժողովի (այսուհետ նաև՝ Հանձնաժողով) 14.05.2020թ.-ի նիստի թիվ 5 արձանագրության համաձայն՝ Երևանի քաղաքապետարանի կողմից կատարվել է «Ռաշն Վոյաժ» ՍՊԸ-ի կողմից ներկայացված բանկային երաշխիքի իսկության ճշտում, որի արդյունքում պարզվել է, որ ներկայացված բանկային երաշխիքը չի թողարկվել համապատասխան բանկի կողմից և հանդիսանում է կեղծ փաստաթուղթ:

vii. Նույն արձանագրության համաձայն՝ հաշվի առնելով, որ «Ռաշն Վոյաժ» ՍՊԸ-ն մինչև պայմանագրի կնքումը ներկայացրել է կեղծ փաստաթղթեր և վերջինս ընտրված մասնակից ճանաչելու մասին որոշումը չի համապատասխանել Հայաստանի Հանրապետության օրենսդրությանը, ուստի հանձնաժողովը, հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման մասին» Կարգի 33-րդ կետի 8-րդ ենթակետը, որոշել է չեղյալ հայտարարել 2020թ.-ի ապրիլի 16-ի թիվ 4 արձանագրության 2.1 և 2.2 կետերով 1-ին և 2-րդ չափաբաժինների մասով ընդունված որոշումները, «Ռաշն Վոյաժ» ՍՊԸ-ի կողմից ներկայացրած հայտը գնահատել անբավարար և մերժել:

viii. «Ամերիաբանկ» ՓԲԸ-ն 04.05.2020թ.-ին տրված թիվ «O.AB.100.7LD.ALLP.0.5161.20» գրությամբ Երևանի քաղաքապետարանին տեղեկացրել է, որ «Ամերիաբանկ» ՍՊԸ-ի (այսուհետ նաև՝ Բանկ) ունեցած տեղեկությունների համաձայն՝ Երևանի քաղաքապետարանին ներկայացված «Ամերիաբանկ» ՓԲԸ պաշտոնական ձևաթղթին նմանեցված 27.04.2020թ.-ի թիվ O.AB. 100.12CIB.PIED.1.4435.20 «Ռաշն Վոյաժ» ՍՊԸ-ի բանկային երաշխիքը՝ ԵԲ-ԲՄԱՁԲ-20/53 ծածկագրով մրցույթին մասնակցելու համար և 12.03.2020թ.-ի թիվ O.AB. 100.12CIB.PIED.2.0245.20 «Ռաշն Վոյաժ» ՍՊԸ-ի բանկային երաշխիքը՝ ԵԲ-ԲՄԱՇՁԲ-20/64 ծածկագրով մրցույթին մասնակցելու համար ներկայացված երաշխիքները իրականում երբևէ չեն թողարկվել և երբևէ չեն տրվել «Ամերիաբանկ» ՓԲԸ-ի կողմից, և ամենայն հավանականությամբ դրանք կեղծվել են անհայտ երրորդ անձի կամ անձանց կողմից, ինչի վերաբերյալ Բանկի համապատասխան աշխատակիցներն արդեն դիմել են իրավապահ մարմիններին:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակցության, որ ՀՀ ֆինանսների նախարարության կողմից 23.05.2020թ.-ի թիվ 26/26-1/7675-2020 գրությամբ «Ռաշն Վոյաժ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգն ենթակա է բավարարման, հետևյալ պատճառաբանությամբ.

ՀՀ քաղաքացիական օրենսգրքի (այսուհետ նաև՝ Օրենսգիրք) 347-րդ հոդվածի համաձայն՝ պարտավորությունները պետք է կատարվեն պատշաճ՝ պարտավորության պայմաններին, օրենքին և այլ իրավական ակտերի պահանջներին համապատասխան:

Օրենսգրքի 408-րդ հոդվածի համաձայն՝ պարտավորության խախտում է համարվում այն չկատարելը կամ անպատշաճ (կետանցով, ապրանքների, աշխատանքների և ծառայությունների թերություններով կամ պարտավորության բովանդակությամբ որոշվող այլ պայմանների խախտմամբ) կատարելը:

Օրենսգրքի 466-րդ հոդվածի 3-րդ մասի համաձայն՝ պայմանագիրը լրիվ կամ մասնակի կատարելուց միակողմանի հրաժարվելու դեպքում, երբ պայմանագրից հրաժարվելը թույլատրվում է օրենքով կամ կողմերի համաձայնությամբ, պայմանագիրը համապատասխանաբար համարվում է լուծված կամ փոփոխված:

ՀՀ կառավարության 04.05.2017թ.-ի թիվ 526-Ն որոշմամբ (10.10.2019թ.-ի թիվ 1422-Ն փոփոխություններով) հաստատված «Գնումների գործընթացի կազմակերպման» կարգի (այսուհետ՝ Կարգ) 32-րդ կետի 19-րդ ենթակետի համաձայն՝ հրավերով նախատեսվում է նաև, որ եթե մասնակցի՝ հրավերով նախատեսված գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Կարգի 50-րդ կետի համաձայն՝ ընտրված մասնակցի հետ պայմանագիրը կնքվում է օրենքի 10-րդ և 36-րդ հոդվածներով նախատեսված կարգով, եթե ներկայացվել է նաև որակավորման ապահովումը հիմնավորող փաստաթուղթը: Ընդ որում, ապրանքների գնման դեպքում ապրանքի ամբողջական նկարագիրը պայմանագրում ներառվում է՝ համաձայն ընտրված մասնակցի կողմից ներկայացված և գնահատող հանձնաժողովի կողմից բավարար գնահատված առաջարկի:

Թիվ «ԵԲ-ԲՄԱՇՁԲ-20/53» և թիվ «ԵԲ-ԲՄԱՇՁԲ-20/64» ծածկագրերով բաց մրցույթների հրավերի (այսուհետ նաև՝ Հրավեր) 8.14-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող հինգ աշխատանքային օրվա ընթացքում նախաձեռնում է տվյալ

մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ: Ընդ որում, եթե մասնակցի գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող կամ մասնակիցը սույն հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը, կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Վերոնշյալ հոդվածների համակարգված վերլուծության արդյունքում, Բողոքներ քննող անձը փաստում է, որ օրենսդիրը հստակ սահմանել է, որ պարտավորությունները պետք է կատարվեն պատշաճ՝ պարտավորության պայմաններին, օրենքին և այլ իրավական ակտերի պահանջներին համապատասխան: Ընդ որում, պարտավորության խախտում է համարվում այն չկատարելը կամ անպատշաճ (կետանցով, ապրանքների, աշխատանքների և ծառայությունների թերություններով կամ պարտավորության բովանդակությամբ որոշվող այլ պայմանների խախտմամբ) կատարելը:

Կարգի 32-րդ կետի 19-րդ ենթակետով՝ որպես պարտավորությունների պատշաճ կատարման իրավական ակտի պահանջ, սահմանվել է պարտավորության խախտման հիմքերը, այն է՝ եթե մասնակցի՝ հրավերով նախատեսված գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Վերոգրյալ իրավանորմերի համալիր վերլուծությունը՝ գործով հաստատված փաստերի գնահատմամբ, թույլ է տալիս եզրակացնել, որ Երևանի քաղաքապետարանի կողմից Կենտրոնի վարչական շրջանի թիվ 20, 21, Նոր Նորք վարչական շրջանի թիվ 99 և Մալաթիա-Սեբաստիա վարչական շրջանի թիվ 76 մանկապարտեզների հիմնանորոգման աշխատանքների ձեռքբերման նպատակով 04.03.2020թ.-ին և Երևան քաղաքի վարչական շրջանների բազմաբնակարան շենքերի մուտքերի վերանորոգման աշխատանքների ձեռքբերման նպատակով 25.02.2020թ.-ին հայտարարված համապատասխանաբար թիվ «ԵԲ-ԲՄԱՇՁԲ-20/53» և թիվ «ԵԲ-ԲՄԱՇՁԲ-20/64» ծածկագրերով բաց մրցույթներին մասնակցելու նպատակով հայտ ներկայացրած «Ռաշն Վոյաժ» ՍՊԸ-ն որպես

որակավորման ապահովում ներկայացրել է «Ամերիաբանկ» ՓԲԸ-ի պաշտոնական ձևաթղթին նմանեցված 27.04.2020թ.-ի թիվ O.AB.100.12CIB.PIED.1.4435.20 և 12.03.2020թ.-ի թիվ O.AB.100.12CIB.PIED.2.0245.20 բանկային երաշխիքներ, որոնք իրականում երբևէ չեն թողարկվել և երբևէ չեն տրվել «Ամերիաբանկ» ՓԲԸ-ի կողմից:

Թիվ «ԵԲ-ԲՄԱՇՁԲ-20/53» և թիվ «ԵԲ-ԲՄԱՇՁԲ-20/64» ծածկագրերով բաց մրցույթների Հանձնաժողովի կողմից կատարված «Ռաշն Վոյաժ» ՍՊԸ-ի կողմից ներկայացված բանկային երաշխիքի իսկության ճշտմամբ պարզվել է, որ ներկայացված բանկային երաշխիքները չեն թողարկվել համապատասխան բանկի կողմից և հանդիսանում է կեղծ փաստաթուղթ:

Հանձնաժողովը, հաշվի առնելով, որ «Ռաշն Վոյաժ» ՍՊԸ-ն մինչև պայմանագրի կնքումը ներկայացրել է կեղծ փաստաթղթեր և վերջինս ընտրված մասնակից ճանաչելու մասին որոշումը չի համապատասխանել Հայաստանի Հանրապետության օրենսդրությանը որոշել է «Ռաշն Վոյաժ» ՍՊԸ-ի կողմից ներկայացրած հայտը գնահատել անբավարար և մերժել:

Բողոքներ քննող անձը հարկ է համարում փաստել, որ «Ամերիաբանկ» ՓԲԸ-ի կողմից 04.05.2020թ.-ին Երևանի քաղաքապետարանին տրված թիվ «O.AB.100.7LD.ALLP.0.5161.20» գրությամբ հաստատվում է, որ «Ռաշն Վոյաժ» ՍՊԸ-ի կողմից Պատվիրատուին ներկայացված 27.04.2020թ.-ի թիվ O.AB.100.12CIB.PIED.1.4435.20 և 12.03.2020թ.-ի թիվ O.AB.100.12CIB.PIED.2.0245.20 բանկային երաշխիքներն իրականում երբևէ չեն թողարկվել և երբևէ չեն տրվել «Ամերիաբանկ» ՓԲԸ-ի կողմից, և ամենայն հավանականությամբ դրանք կեղծվել են անհայտ երրորդ անձի կամ անձանց կողմից:

Հակառակ փաստի մասին վկայող որևէ թույլատրելի և վերաբերելի ապացույց, Ընթացակարգի քննության ընթացքում, Բողոքներ քննող անձին չներկայացվեցին, որպիսի պայմաններում հնարավոր կլինեն և կհիմնավորվեն բանկային երաշխիքների իսկության հանգամանքը:

Ընդ որում, գործի լուծման համար էական նշանակություն ունեցող փաստի առկայությունը կամ բացակայությունը վիճելի լինելու դեպքում դրա բացասական հետևանքները կրում է այդ փաստի ապացուցման պարտականությունը կրող կողմը (*տես՝ թիվ ԵԱՆԴ/0479/02/08 գործով Վճռաբեկ դատարանի 2009 թվականի փետրվարի 13-ի որոշումը*):

Միաժամանակ Վճռաբեկ դատարանը նշել է, որ յուրաքանչյուր գործով ապացուցման առարկան ձևավորվում է ոչ միայն հայցի կամ դրա դեմ բերվող

առարկությունների հիմքում ընկած փաստերից, այլև վիճելի իրավահարաբերությունը կարգավորող իրավանորմում մատնանշված փաստերից (տես՝ թիվ ԵԱՔԴ/0232/02/11 գործով Վճռաբեկ դատարանի 2013 թվականի դեկտեմբերի 26-ի որոշումը):

Օրենքի 6-րդ հոդվածի 1-ին մասի 6-րդ ենթակետի համաձայն՝ գնումների ընթացակարգերին մասնակցելու իրավունք չունեն այն անձինք՝ որոնք հայտը ներկայացնելու օրվա գրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Կարգի 45-րդ կետի համաձայն՝ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Նշված իրավանորմերի վերլուծությունից պետք է փաստել, որ Օրենսդիրը մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու համար նախատեսել է սպառիչ պայմաններ, որոնք են պայմանագրով նախատեսված կամ գնման գործընթացի շրջանակում ստանձնած պարտավորությունների խախտումը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որպես ընտրված մասնակից պայմանագիր կնքելուց հրաժարվելը և հայտերը բացելուց հետո գնման գործընթացին հետագա մասնակցությունից հրաժարվել: Այսինքն՝ միայն սույն դեպքերում է հնարավոր մասնակցին ներառել գնումների գործընթացին մասնակցելու իրավունք չունեցող մասնակիցների ցուցակում:

Սույն գործի փաստերի համաձայն՝ «Ռաշն Վոյաժ» ՍՊԸ-ն մասնակցության հայտի թիվ 1 հավելվածով՝ բաց մրցույթին մասնակցելու դիմում-հայտարարությամբ, հայտարարել և հավաստել է, որ բավարարում է թիվ «ԵՔ-ԲՄԱՇՁԲ-20/53» և թիվ «ԵՔ-ԲՄԱՇՁԲ-20/64» ծածկագրերով բաց մրցույթների հրավերներով սահմանված մասնակցության իրավունքի պահանջներին և պարտավորվում ընտրված մասնակից ճանաչվելու դեպքում, հրավերով սահմանված կարգով և ժամկետում, ներկայացնել գնային առաջարկի չափով որակավորման ապահովում:

Բողոքներ քննող անձը փաստում է, որ Մասնակիցը ընտրված մասնակից ճանաչվելու դեպքում, հրավերով սահմանված կարգով և ժամկետում պարտավոր է ներկայացնել գնային առաջարկի չափով որակավորման ապահովում: Հակառակ դեպքում՝ հրավերով սահմանված կարգով և ժամկետում որակավորման ապահովում չներկայացնելու պարագայում, այդ հանգամանքը համարվում է որպես գնման գործընթացի շրջանակում ստանձնած պարտավորության խախտում:

Վերոնշյալներով պայմանավորված՝ առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետի դրույթների կիրառման անխուսափելիությունը, քանի որ Մասնակիցն իր գործողություններով կամ անգործությամբ, խախտելով գնման գործընթացի շրջանակում ստանձնած պարտավորությունը, հանգեցնում է պատվիրատուի կողմից գնման գործընթացին տվյալ մասնակցի հետագա մասնակցության դադարեցմանը:

Վերը շարադրվածից ելնելով՝ մասնակիցը պետք է ընդգրկվի գնումների գործընթացին մասնակցելու իրավունք չունեցող մասնակիցների ցուցակում, քանի որ խախտել է գնման գործընթացի շրջանակում ստանձնած պարտավորությունը՝ հրավերով սահմանված կարգով և ժամկետում չներկայացնելով որակավորման ապահովում, որն էլ հանգեցրել է գնման գործընթացին տվյալ մասնակցի հետագա մասնակցության դադարեցմանը:

Նշվածով պայմանավորված՝ Բողոքներ քննող անձն արձանագրում է, որ մասնակիցը պետք է ընդգրկվի գնման գործընթացին մասնակցելու իրավունք չունեցող մասնակիցների ցուցակում՝ 2 (երկու) տարի ժամկետով:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում Բողոքներ քննող անձը հանգում է այն եզրակացության, որ «Ռաշն Վոյաժ» ՍՊԸ-ն խախտել է գնման գործընթացի

շրջանակում ստանձնած պարտավորությունը, որն էլ հանգեցրել է գնման գործընթացին տվյալ մասնակցի հետագա մասնակցության դադարեցմանը:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը.

Ո Ր Ո Շ Ե Ց

1. ՀՀ ֆինանսների նախարարության կողմից 23.05.2020թ.-ի թիվ 26/26-1/7675-2020 գրությամբ «Ռաշն Վոյաժ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված թիվ ՍՑ-ԼՕ-2020/132 ծածկագրով ընթացակարգը բավարարել:

2. «Ռաշն Վոյաժ» ՍՊԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ 2 (երկու) տարի ժամկետով:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

ՀՀ ԳՆՈՒՄՆԵՐԻ ՀԵՏ ԿԱՊՎԱԾ

ԲՈՂՈՔՆԵՐ ՔՆՆՈՂ ԱՆՁ՝

ԼԵՎՈՆ ՕՇԱՆՅԱՆ

